

孫夏峯先生年譜



孫夏峯先生年譜

湯斌等編次
方正苞訂正

叢書集成初編

(補印本)

孫夏峯先生年譜

一九三七年六月初版
一九五九年十月補印

湯斌等編次

方苞訂正

商務印書館出版

上海大眾文化印刷廠印刷

序

容城孫徵君既歿之三十有九年。其曾孫用楨。以舊所編年譜。屬余刪定。既卒事。而爲之序曰。自古豪傑才人。以至義俠忠烈之士。不得其死者衆矣。而傳經守道之儒無是也。極其患。至於擯斥流放胥靡而止耳。其或會天道人事之窮。而至於授命。則必時義宜然。而與俠烈者異焉。世皆謂儒者察於安危。謹於去就。故藏身也固。近矣。而未盡也。蓋人之於天也。以道受命。三才萬物之理。全而賦之。乃昏焉不知其所以生。而自殽於物者。天下皆是也。記曰。人者。天地之心。惟聖賢足以當之。降此則謹守而不失。惟儒者殆庶幾耳。彼自有生。以至於死。屋漏之中。終食之頃。慄慄然惟恐失其所受之理。而無以爲人。其操心之危。用力之艱。較之奮死於卒然者。有十百矣。此天地所寄以爲心。而藉之紀綱乎人道者也。豈忍自戕賊哉。孔子於道。常歉然若不足。而死生之際。則援天以自信。蓋示學者以行身之方。而使知其極也。先生生明季。知天下將亡。而不可強以仕。此固其所以爲明且哲也。然楊左諸賢之難。若火燎原。而出身以當其鋒。其後屢聚鄉兵。以保州部。既老。屏跡耕桑。猶以宵人。幾中機辟。迹其生平。跼於危死者數矣。在先生自計。固將坦然授命而不疑。而卒之身名泰然。蓋若有陰相者。今譜厥始終。其行事或近於俠烈。而治身與心。則粹乎一準於先儒。學者考其立身之本末。而因以究觀天人之際。可以知命而不惑矣。後學方苞撰。

孫夏峯先生年譜卷上

門人

灤水趙御衆
上谷魏一龍
范陽耿極

編次

桐城方苞訂正

先生諱奇逢，字啓泰，號鍾元，兩朝徵聘不就。天下稱曰孫徵君。晚年講學夏峯，學者稱曰夏峯先生。壽九十有二。按先生自敘云：余家先世小興州人，上世無所考。明永樂初，奉詔內徙，有祖諱忠者，遷容城縣東北賈家莊，家焉。田廬墳墓俱在此，是爲始祖。逾二世，諱廣，廣生諱信，信生諱端，俱以農世其業。隱德弗耀，端生諱廷寶，以生齒繁衍，移居北城村。生諱臣，字敬所，由嘉靖辛酉舉人，仕至河東鹽運司運判，居官清慎，居鄉寬忍，是爲余大父。運判公生六子，先大人諱丕振，字肯軒，以生員授儒官。運判公季子也，生平孝友，爲里黨所推，定興鹿忠節公善繼銘其墓。母陳氏，生余兄弟四人，長奇儒，字國重，抗爽有氣節，縣庠生，學使者給冠帶儒官。次奇遇，字啓運，縣庠生，六行克備，遠邇咸服其德。皆余兄也。季弟奇彥，字啓美，天啓辛酉恩貢，仕山東武城縣知縣，廉慎不愧余祖。余少席祖父餘蔭，長依兄弟兼師友之提攜，自愧不克豎立，今八十有七矣。回憶生平，恍如隔世。兒子暨門人輩，每

詢舊事。輒信手筆之於冊。志生我與成我之德於不忘也。

此庚戌冬月。先生八十七歲時自敘也。於逐年之下。僅記所寓之地。間及其事與人。其文甚略。今標以爲綱。採輯事實。附之爲目。至庚戌後五年。於日譜中補入。亦準前例。

萬歷十二年甲申十二月十四日戌時生。

先生生于北城村。南距容城縣治三里。蓋河東公卜築之鄉也。聞諸父老云。先生能言甚遲。甫言即手指門樓字能識之。

十八年庚寅七歲。

入小學。蒙師邑庠生
槐肖林正華

二十二年甲午十一歲。

始學文。從師邑庠
生張公鑑

二十五年丁酉十四歲。

入邑庠。提學御史爲周公孔教。

父命同仲兄季弟從長兄學。

一日先生隨父肯軒公謁楊補庭。補庭爲忠愍公子。先生大母族也。見先生奇而愛之。因問曰。設使我在圍城中。外無救兵。內無糧草。應如之何。先生應聲曰。効死勿去。補庭爲肯軒公賀曰。

此子足下終身矣。

與鹿伯順論交。鹿公諱善繼。家定興之江村。距先生所居北城三十里。相過論交。肯軒公見而喜之。謂先生曰。鹿子言動不凡。殆古之狂士。後伯順聞之曰。何以得長者之知我乎。

二十六年戊戌。十五歲。

食廩餼於庠。

二十八年庚子。十七歲。

秋八月。舉順天鄉試。

主考爲楊公道賓。福建晉江人。顧公天峻。江南崑山人。房師章公石麟。湖廣黃岡人。章批其闈卷云。疾徐豐約。一準程朱。先生嘗云。余時於程朱尙未有所窺。師何所見而預爲啓佑耶。每晤輒謂學人第一要擇

交。少年更

爲切務。

二十九年辛丑十八歲。

春下第。

房師韋過先生寓館人遺傳奇本於案上。韋大督過。因言古人以少年登科。爲大不幸。稍不自立。未有不敗者。先生因此益自奮勉。後每舉以告吾黨。

娶槐氏。

邑庠德行生秋亭譚大成女。

三十年壬寅十九歲。

父命從季父成軒公學。季父一切家務。父皆爲之經理。

成軒公醇篤性成。其學得之河東公庭訓。先生家學淵源。蓋本諸此。先生非義不取。上官或有以燈火之資餽者。父母分

給之。先生仍

出爲公用。

三十一年癸卯二十歲。

在北城。

三十二年甲辰二十一歲。

下第歸。肯軒公謂先生曰。國朝重制科。不舉南宮者。謂之半截功名。未免降志。後當路累薦舉先生。每引此言。堅謝不出。

督學御史授父儒官。有司旌門。

肯軒公以生員授儒官。邑令蔣如平請鄉飲賓。其詞曰。品高月旦。德重鄉評。獨力養親。克篤烏私之愛。一經教子。早題雁塔之名。羽可爲儀。俗因以變。殆公實錄云。

三十三年乙巳。二十二歲。

六月八日。先府君以偶患心痛卒。越三月。營葬事成。

先生居肯軒公喪。一準古禮。偕兄弟。結廬墓側。於東南隅。築時思亭。設衣冠圖書。鄉老劉廷林王勳等。歲時率衆獻食果。必

哭於墓。肯軒公厚德入人之深。於此可見云。○先生溽暑苦塊中病。後每夏秋交。輒痰飲嘈囋。廢飲食。成例病者。幾四十年。至六旬後竟愈。

三十四年丙午。二十三歲。

居父憂。偕兄弟居墓側。

二月三日。祖母楊安人卒。

安人。忠愍公再從姪女也。佐河東公宦游十餘年。衣飾儉素。年八十餘。先生嘗言。祖母以勤吾父而隕命。余母慟姑而夙病益增。哀哀諸孤。籲天無路。相對飲泣而已。

三十五年丁未。二十四歲。

居父憂。仍居墓側。

九月服闋。

冬。邑紳梁如星爲宦寺所窘辱。余與諸紳士言於郡縣。事得白。

書略云。異哉梁孝廉薛茂才之事。天理王法。真是大變。夫薛璫一小豎子耳。餘皆小豎子之奴隸耳。

遂敢鞭撻孝廉。幽囚士子。奉詔入試之日。尙可謂有世道哉。聞人之熾惡。斯文之喪氣也。明公風教攸握。值此非常異惡。察其主謀者何人。黨惡者何人。嚴訊而置之法。庶穢汚刑餘之徒。猶知有朝紳。猶知有天憲。則扶文抑暴之功。高於千古矣。

三十六年戊申二十五歲。

春。建先祠成。合祀歷代考妣。同族人歲時致祭。其基址規度。皆府君生時裁定。

祠在北城。先生祀先睦族之事。各有定期。貧士皆可做而

之行。

十月九日。母陳孺人卒。孺人遭痼疾三十二年。奉姑以孝。稱家政井然。處異母妯娌無間言。

三十七年己酉二十六歲。

春奉母合葬府君墓

鹿忠節公爲誌銘先生偕兄弟廬墓側張子度果中從廬中問業

三十八年庚戌二十七歲

居母憂

仍居墓側

邑學博謝慕劬嘗過廬居論學

謝諱夢豹廣東人正身率士所著有修齋錄

清苑賈鉅居紀事略云歲在乙巳孫肯軒公歿其嗣君國重啓運啓泰啓美同廬於墓三年越戊申公配陳孺人歿四嗣君又廬於墓者三年余按肯軒春秋僅享五十有五其時國重啓運業聲張譽序啓泰當警雅歌鹿鳴已五閱歲啓美髮未燥于乙巳逝頻公與陳孺人率嗣君奉楊太安人起居甚融融也夏無病忽歿嗣君兄弟謂未獲申菽水一日養而風木永嗟安忍遺先骸于野而僣然家居乎乃稟命太安人孺人就墓前橫構一室陳公之冠履圖書顏曰棲神堂東南隅又結草屋如斗南北對向四壁茅籬塗以泥土西向者二一待疇客一貯家禮子史諸經典北向者二一設苦席長枕大被四晝夜寢一具突而黔供饘粥嗣君早暮焚香楮冥椒漿盥濯巾櫛無不備每飯踞設遇佳辰令節更羅列哭踊歷三年如一日陳孺人久患嘔以痛公轉劇太安人又夕陽景兼痛公不壽四君廬居晨起展拜卽歸趨兩尊人所勉爲愉容多方開慰令諸婦善視膳輒返墓間無何太安人逝孺人痛公又痛姑疾益劇太安人服甫闋而孺人逝矣四君既合葬局其家之外戶水薪米鹽零雜以時遞送諸妯娒晝食一盤夜棲共樓並無煩四君內顧四君一意讀禮日在棲神堂時對讀讀罷對泣泣罷再讀儼然肯軒公在上也嚴寒盛暑雨雪雷電子夜風吼四望闕寥當此而悲號嗚咽眞所謂狷聞腸寸斷矣翼殯最粗淡謝絕麤齋鮮脆不御如是者六年終始如一嗚呼可不謂難哉

高陽孫文正公題廬詩。容城城坳大如斗。今古賢豪萃作叢。靜修之修忠愍忠。撐拄乾坤萬不朽。行天日月地江河。出奉君王入父母。孝廉崛起兩賢鄉。手握天常爲世紐。黃金臺上已知名。高堂舞綵歌曼壽。一朝風雨下庭幃。大椿零落諼花剖。夜臺長夜寂無人。忍見野林狐兔走。九原日憶念兒心。六載枕苫相與守。諸婦同集一畝宮。僊龍劣虎聲如吼。蓼我有句不成讀。黃土一杯淚爲臯。紫荊花闌雨盈襟。鴻雁影聯月在牖。隴笛咽寒幾斷腸。夜烏泣雲空迴首。我親亦未嘗君食。帝書日月懸培塿。感君兄弟倍酸辛。孝子忠臣天并久。君家兄弟遠相傳。亭亭玉樹師且友。能與朝廷生異人。應得異人還報厚。

定興鹿忠節公詩云。橫轡東海揖郎山。中有一廬無愧顏。毀後僅餘眉宇在。慙來惟把蓼義刪。地當趙北燕南際。人跨椒山夢驥間。客子語言忽可味。細詢知自見君還。

三十九年辛亥二十八歲

正月服闋

先生家世清白。廬居時。嘗至餽粥不給。而守貧彌堅。一老蒼頭於墓傍種菜。蔬北瓜其大異常。見者以爲三冬菹。七年粟之一驗云。

按先生志學當自此始。憶友人問曰。先生自考志學。以何時爲可持循之日。先生云。少年妄意功名。自兩親見背。此念頓灰。與鹿伯順爲友。初以名節相砥礪。未免走入氣質之偏處。闔然一念。自證生人面目。其實從哀慟窮苦中得來。

告同人爲割耳李節婦助葬

邑午方村節婦李氏。夫死。曾割耳投棺中。誓不再適。貧老無依。先生糾同人養之數年。迄歿。爲具棺助葬。并恤其子。後其子婦復勵節。一方女教爲之大著焉。

秋寓京師館兵部郎杜友白家

友白名詩。山東人。墓先生爲人。以其子受學。

十一月長子立雅生。

四十年壬子二十九歲。

寓京師孝子賈三槐受學。

三槐字正卿固安人兩廬父
母墓實過魯先生卒成就之。

晤曹貞予先生舉仁體以告。

貞予名于汴山西安邑人以正學自任語先生仁體
反覆發明先生當下恍然覺此心與天地萬物相通。

四十一年癸丑三十歲。

下第仍寓京師居停主人牛俊臣。

俊臣字仰泉任俠好客重先生品
行願假館一時正人皆與之遊。

與周景文論交。

鹿伯順先生是年舉進士周景文順昌其同年友也因伯順與先生爲友一日向先生索楊忠愍集先生曰忠愍
爲世廟忠諫第一君定不作第二人伯順有詩紀之曰囊中第二非吾事好向椒山句裏尋後周死逆璫最烈果

第一。

同鹿伯順讀王文成傳習錄。

先生初守程朱甚篤鹿先生講次每舉姚江語先生
因讀傳習錄知行合一躍然有得自是寢食其中焉。

十一月次子奏雅生。

四十二年甲寅三十一歲。

在京師。

周綿貞時過余邸舍。周名起元江西人以候命御史在都見先生制藝有志之丈夫不受制于造物句向友人曰讀孫公此二語令人氣躍千丈

六月例病與友人講習以代醫藥。先生自二十二歲廬中感嘈雜每夏秋之交必發廢飲食因自名爲例病友人許紫垣爾顯時讀書崇國寺常邀過其舍以講習代醫藥先生病漸瘳

四十三年乙卯三十二歲。

在京師。

爲邑紳陳見齋立嗣。陳名可成舉人爲令歿而無子先生言于邑令徐君廷松擇近支一人繼之徐卽告寔於其墓且出金經理其家

四十四年丙辰三十三歲。

在京師。

薛孔泉唐灼州賈孔瀾各遣子受學。

薛之子鳳祚賈之子爾霖後先生以長女妻爾霖。

四十五年丁巳三十四歲。

歸容城。

先生居京師者六年皆鹿伯順范一泉兩先生爲之左右至薪水之需牛仰泉任之先生嘗云余生平稍知自勵卽服膺伯順與一泉先生伯順每言以改過而成賢者獨見范老耳。

爲牛陰兩生免大戶。

太守洪振溪派牛陰兩生收糧大戶牛爲蓬萊令學曾子陰爲臨朐令助子邑紳舊無此例先生合詞致書略云一時有令甲一隅有風俗容之鄉紳士子其一切養馬納糧具無異於平民獨於頭役一節從來

得稍一寬假今臨朐蓬萊二君卽於宦途若拙叨列賢書素稱曲謹明公得之於月旦者自悉今其兩子青衿也屢赴秋闈志期進取乃俱不免於大戶之役卽此時遵憲勉應恐後來援以爲例北海有言民猶子也士大夫賢子也愛子尤當愛子之賢者或亦養

賢及民之意古所謂君之仁者善養

土此實某等所幾幸於今日者也。

八月三子望雅生。

冬長女歸賈氏。

先生製布衣一襲謂之曰汝家漸貴盛歸寧當著此服勿忘吾家累世布素後女撫孤守節壽八十餘臨終仍以此服殮。

四十六年戊午三十五歲

七月二十七日室人槐氏卒

槐孺人年僅三十四歲先生誄有云氏知大體能甘貧吾妻實吾友也文載家乘

冬同楊太僕讀書西張寺

楊名茂定興人時李含樸鹿伯順范懷深常相過從

四十七年己未三十六歲

爲蘇湯宇與王坦山太守書略云雄縣廩生蘇湯宇苦心砥行學古之士也生平孝友雅重鄉評兩舉行優荷蒙褒賞食廩近三十年毫無分外一事某等結社於二十年之前不獨文義相長實以行誼共推鹿職方伯順賈憲副孔澗俱同聲味姑舉其一事有同案生王述德棄世妻李氏貧不能養二子俱襁褓湯宇固寒士也慨然捐廩銀一年倡諸好義者爲治恆產迄今李氏母子得以完聚蘇生之修持雅多類是今當陪貢之時考居四等本生屬文於病荒之際義命自安某等論行於考試之餘甄拔是望三輔士曉然知文藝之外別有立身根本一方風教賴此舉矣書入蘇生得復

萬歷四十八年

庚申三十七歲

秦昌

元年

同門友任東海署雄縣諭予過視留十日歸

任名明臣青縣人正躬率土風教大行先生極重之

魏廓園出使江右訪余北城定交楊忠愍公祠

嘉善魏公名大中偕鹿伯順訪先生詩云平生幽谷間神州恣飛越云在北城北不勝意勃宰並轡獲良儔一舍奄超忽登堂列玉昆藹然對

清懋久儲易州酒佐之以穀核懽情不自持後先微譌發何必墓古人俛仰亦恍惚遺村綠四圍中天寫明月

邑庠生楊格忠愍族孫以罪誤被黜余代爲白

楊格被黜人皆憐其無辜先生言之邑令爲申請得復

爲孝子趙廷桂助婚

天啓元年辛酉三十八歲

至京師赴鹿伯順約

左浮丘督畿輔學歸京師晤於別墅

左公名光斗桐城人謂魏公廓園曰予也差學差俱於孫孝廉有侯儀予過容城不能邀一見竊疑之廓園以告先生曰不才繫籍賢書院體當廷謁予於左公有故人之誼

不往見乃以存故人也浮丘公聞之曰予知過矣乃折東迎先生於別墅

八月繼娶楊氏

邑明經楊慎齋廉女